



PRIMEIRO
MINISTRO

**DISKURSU SUA ESELÉNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE
DR. RUI MARIA DE ARAÚJO
IHA BIBAN ANIVERSÁRIU DA-XVI
POLÍSIA NASIONÁL TIMOR-LESTE NIAN**

**Sentru Formasaun Polísia, Díli
Loron 28, fulan Marsu, tinan 2016**

Eseléncia Señor Vice-Presidente Parlamentu Nasionál

Eselentísimu Señor Ministru Interior no Membru Governu nian sira
Eselentísimu Señor Xefe Estadu-Maior-Jeneral F-FDTL no Xefe Estadu-Maior

Eselentísimu Señor membru Parlamentu Nasionál

Señor Komandante-Jeral Polísia Nasionál Timor-Leste
Señor Komandante Unidade sira no Xefe Servisu sira iha PNTL
Señora no Señor Ofisiál, Sarjentu, Ajente no Funsionáriu Sivil sira PNTL ninian

Señora no Señor Representante sira Corpu Diplomátiku ho Autoridade Relijiosa no Administrativa sira

Senhores Antigos Combatentes Veteranos nomos Fundadores Movimento Libertasaun Nasionál ninian

Yang terhormat rombongan dari propinsi tetangga NTT mewakili sahabat Républik Indonesia

Ita ohin halibur hamutuk iha ne'e, atu celebra tan tinan ida ezistencia Polisia Nasional Timor-Leste ne'ebé horiseik, dia 27 Marsu 2016, kompleta tinan 16, iha loron ne'ebé sarani katoliku iha mundu tomak celebra mos Nai Jesus Kristu ninia moris hias. Tamba ne'e, no tamba mos buat hotu-hotu ne'ebé PNTL hala'o tiha ona iha tinan sanulu-resin-noon nia laran, hodi Governu tomak nia naran, hakarak hato'o Paskoa Kmanek ida ba membro PNTL tomak, no Parabéns ba imi nia loron aniversáriu. Parabéns ba instituisaun ne'e rasik, no ba ema hotu ne'ebé hola parte iha instituisaun ne'e nia laran, hahú hosi Komandante-Jerál, órgaun assessoria no inspesaun nian, hanesan Konsellu Superiór Polísia, no Inspesaun-Jerál, komandu-Jerál, Unidade no Servisu oin-oin no mos Sentru Formasaun Polísia.

Ha'u hakarak aproveita mos biban ida ne'e, atu dala ida tan hato'o iha públiku, liafuan agradementu ba Ministru Interior, Dr. Longuinhos Monteiro no ba Señor Komisariu Dr. Afonso de Jesus, ne'ebé foin hetan investidura ho medalla Ordem Timor-Leste nian, nu'udar kondekorasaun husi Sua Eseléncia Señor Presidente da República. Ita bo'ot nain rua nia dezempeñu, espíritu misaun, dedikasaun no profesionalizmu nu'udar Komandante-Jerál PNTL, knar ne'ebé iha responsabilidade boot tebes, fo'o ona kontinuidade hodi kumpri propóritu PNTL nian, hodi tau matan ho responsabilidade boot ba ema hotu – ba Nasaun, ba populasaun no ba Instituisaun – hodi halo mos instituisaun ne'e sai dezentolvidu no metin liu tan.

Hanesan ita hotu hatene, Polísia Nasionál Timor-Leste iha papel fundamental iha prosesu hatúr orden no protéje timor-oan sira, sidadaun ein jerál, no Estadu rasik, iha nível hotu-hotu. Ezersisiu kompeténsia hirak ne'e, esensiál tebes hodi bele harí Estadu demokrátiku ida, no tanba ne'e maka fundamental mos, prosesu reforma institusionál, ne'ebé hala'o tiha ona no sei halao nafatin, prosesu ida ne'ebé, maski la'os lais, no la'os mos fásil, produz dadaun ona rezultadu, hodi nune'e, ohin loron Timor-Leste bele moris iha klima ida ho dame no hakmatek.

Kada tinan ne'ebé liu, no ita hakat liu ona tinan sanulu-resin-neen, PNTL buras no hakbi'it ninia kapasidade ba beibeik, atu bele ezerse ninia funsaun, no assumi kompeténsia barak liu tan iha área oi-oin, dala balun iha área ne'ebé relasiona ho direitu, liberdade no garantia ba sidadaun sira, dala seluk fali, relasiona ho seguransa Paíz nian. Ita presiza rekoñese katak PNTL konsege ultrapassa ona fragilidade lubun ida, no konsege aperfeisoa nia-a'an, hodi mos konsege halo di'ak liu tan planeamento no administrasaun ba rekursus, iha misaun oi-oin, ho objetivu atu serbi ita nia populasaun no ita nia Pátria.

Eselénsias,
Señora no Señor sira hotu

PNTL iha funsaun atu kontrola, hodi prevene no kombate hasoru krime, prezerva orden públika, hodi halo ema bele kumpri lei, no asegura kondisaun seguransa ne'ebé bele garante funksionamentu normal instituisaun demokrátiku sira. Nia iha mos funsaun atu protéje sosiedade, hodi atende, fo asisténsia no defende ema hirak ne'ebé presija. PNTL mos maka defende direitus umanus ema timor-oan millaun ida resin, no mos sidadaun sira seluk ne'ebe moris iha Timor-Leste.

PNTL la halo pakto ho hahalok-a'at babeur nian sira, ne'ebé bele hakanek sosiedade no Estadu. Tanba ida ne'e, ita hotu presiza valoriza atitude ida ne'e. Ita presija entende katak PNTL ninia atusaun, hamutuk ho instituisaun seluk ne'ebé protéje Estadu, direitus umanus no sosiedade, iha relasaun ho ita hotu no ita ida-idak, no sira hala'o kna'ar ida ne'e, ba ema hotu nia bem-estar, no ba ita nia Pais ninia seguransa.

Tanba ne'e, importante atu ita konsiénte katak bem-estar no seguransa sai nu'udar sidadaun ninia direitu, maibemós sai nu'udar dever ida sidadaun hotu hotunian. Komunitade presiza partisipa, liu husi buat ne'ebé ita hotu hatene nu'udar polisiamentu komunitariu, atu nune'e forsa seguransa sira bele produz resultado ne'ebé di'ak, iha bem-estar no seguransa Paiz nian.

Hau fo'o hanoin hikas fali katak iha tinan kotuk, iha aniversariu dala sanulu-resin-lima, iha duni fatin ida ne'e, hau apela ba konsentrasaun bo'ot liu-tan iha área polisiamentu komunitáriu, kontrolu fronteira terrestre no marítima, no seguransa rodoviária. Tinan ida liu-tiha, buat balun konsege halo ona, maibémos buat lubun ida sei hein hela atu implementa. No ohin, hau hakarak reitera fali katak Komandu PNTL tenki nafatin orienta esforsu tomak atu hametin liu tan polisiamentu iha área tolu ne'ebé hau foin temi dadaun.

Iha ninia Planu Estratéjiku, PNTL hakarak hamosu modelu polisiamentu VIP, katak "V" ba "vizibilidade" polisia nian iha comunidade nia le'et, hodi nune'e comunidade bele sente seguru, no ema ne'ebé hanoin a'at, bele hanoin dala-rua ka dala barak liu, molok atu halo buat a'at-ruma; "I" ba "involvimentu" comunidade atu bele sente katak comunidade rasik sai parte husi sistema seguransa; no "P" ba "profisjonalizmu" polisia ninian, ne'ebe ita bele sukat husi comunidade ninia satisfasaun, ka comunidade ninia hanoin kona-ba PNTL rasik. Tamba ita sei iha hela ambiente Páskoa nian, mai ita halo "ezame konsiénsia" hodi husu ba ita ida-idak nia-a'an, se ita implementa duni ona

modelu polisiamentu VIP ne'e ka lae? Eh keta VIP ne'ebé ita ida-idak, ka ita balun implementa, sai fali *Violentu ba 'V', Invizivel ba 'I'* no *Parsiál ba 'P'*. **Hau fiar katak ita hotu lakohi modelu polisiamentu ida ne'ebé Violentu, Invizivel no Parsiál.**

Ho hanoin hirak ne'e, hau aproveita oportunidade mós atu dezafia Komando-Jeral, Komandu Unidades, Komandu Servisus, no mos Komandu Munisipiu sira atu reforsa kapasidade subjektiva ida-idak ninian atu komanda, katak, reforsa ida-idak ninia abilidade komandu nian, hodi implementa duni modelu polisiamentu ida ne'ebé iha duni **visibilidade, involvimentu no profesionalizmu**. Hau dezafia mos ofisiáis, sargentos no agentes hotu-hotu, atu hatudu profesionalizmu bo'ot liu tan, iha ita bo'ot sira nia servisu loron-loron, liu husi **disciplina, rigor, no izensaun** iha ita bo'ot sira nia atuasaun polisiamentu hotu-hotu.

Esforsu tomak ne'ebé PNTL hala'o hanesan instituisaun konsege imprimi ona kredibilidade iha nível nacional no internacional. Iha panorama mundial oras ne'e dadaun, no ho globalizasaun ameasa oi-oin, importante tebes atu nafatin transmiti ba populasaun no ba Paiz tomak, konfiansa iha ita nia politika seguransa nian. Se ita la halo ida ne'e, ita tau iha risku ambiente estável no seguru ne'ebé ita konsege hamosu ona, estabilidade no seguransa ne'ebé lori ona bem-estar ba ita nia sidadaun sira, no lori mos imagem konfiansa liu-tan ba ita nia rain.

Keta haluhan katak ita nia Paiz ninia dezenvolvimentu la'o hamutuk ho dezafiu foun oi-oin, ne'ebé asociadu ho dezenvolvimentu ne'e rasik, liu-liu iha ita nia relasaun ho Paiz sira seluk, no mos ho mundo tomak, no mos iha relasaun ho karakter konstrusaun Estadu no Nasaun, ne'ebé tenki nesesariamente liu husi prosesu demokrátiku. Molok PNTL kompleta tinan sanulu-resin-hitu iha tinan oin mai, ka ema sei bolu sweet seventeen, ita sei hahu halo preparasaun ba eleisaun prezidensial no parlamentar. Faze ida ne'e, sei sai mos dezafiu importante ida tebes ba disciplina, rigor no izensaun ofisiáis, sargentos no agente PNTL sira hotu.

Keta mos haluhan katak seguransa nasional, ne'ebé ninia parámetru evolui no modifika ba beibeik, sei nafatin sai hanesan ita nia objektivu ida boot liu, no atu defende ida ne'e maka ita hotu – Estadu, Governu no Forsa Defeza no Forsa Seguransa – hamutuk servisu hodi haka'as-an tuir Konstituisaun no lei haruka.

Eselénsias

Señora no Señor sira

PNTL ohin sai nu'udar instituisaun ho perkursu ne'ebé hatudu pasu bo'ot lubun bo'ot ida, ne'ebé hala'o tiha ona hodi fortalese no konsolida nia-a'an, maibémos sei nafatin sai nu'udar instituisaun ida ne'ebé sei preziza buras no sai forti liu tan. Rekursu Umanu ne'ebé sai nu'udar ninia kbi'it, kapasitadu liu tan ona, no iha koñesimentu ne'ebé di'ak liu tan, hodi kontribui ba instituisaun ninia kresimentu.

Maibé sei presija kontinua hala'o esforsu ida ne'ebe hodi hasa'e kapasidade sai ás liu tan. No presija halo ida ne'e hodi labele tau ba kotuk disiplina, rigor no izensaun nu'udar sasukat ba dezempeñu profisional ne'ebé ita hotu tenki impoin ba ema hotu ne'ebé hetan konfiansa atu hala'o dever no responsabilidade importante hanesan dever no responsabilidade atu serbí Estadu ne'ebe PNTL mos halao. Ita ida-idak presija kaer

metin ba étika profissionál, ho seriedade atu bele kumpri ida-idak ninia obrigasaun. Tanba ne'e maka mos importante ba lideransa iha instituisaun ida hanesan PNTL, atu bele prepara didi'ak forsa ida unidu no firme, onradu, disiplinadu no bele responde ba ejijénsia hirak ne'ebé mosu loron-loron.

Maizoumenus tinan ida liu-ba Komandante-Jerál PNTL, Komisáriu Júlio da Costa Hornay, no 2.º Komandante-Jerál PNTL, Komisáriu Faustino da Costa, sira nain rua simu kna'ar lideransa ka komandu iha instituisaun ida ne'e. Knar hirak ne'e lori responsabilidade, ejijénsia boot, no presiza iha kompeténsia profissionál, liu-liu presiza iha disciplina, presiza iha rigor no izensaun. Ha'u reitera votus susesu iha ita bo'ot nain rua nia kna'ar.

Tinan ida liu-ba, iha fatin hanesan, hau rekoñese mos espíritu esforsu no sakrifisiu membro hotu-hotu PNTL ninian, no hau afirma iha ita bo'ot sira hotu nia oin, Governu nia konfiansa iha instituisaun ida ne'e.

Ohin liu tiha tinan ida, hau hamri'ik fali iha ne'e, atu rekoñese nafatin espíritu esforsu no sakrifisiu husi oficiais, sargentus no agente sira hotu, no reitera hikas governu nia konfiansa iha ema hotu ne'ebé hakna'ar-an iha instituisaun ida ne'e, no mos konfiansa iha instituisaun ne'e rasik.

Ita hotu espera katak ho esforsu oficiais, sargentos no agentes sira, ho apoiu husi parseiru hotu hotu ne'ebe ohin señor Komandante Jeral temi tiha ona, ne'ebé hau aproveita mós atu agradese iha loron importante ida ne'e, modelu polisiamentu VIP ne'ebé PNTL hakotu ona iha ninia Planu Estratéjiku, belesai realidade murak, hodi determina seguransa, estabilidade no bem-estar iha rai doben ida ne'e.

Votus susesu ba PNTL nu'udar instituisaun, no susesu mos ba oficiais, sargentos no agente sira hotu.

Obrigadu ba ita bo'ot sira nia atensaun.

Dr. Rui Maria de Araújo
Díli, 28 de março de 2016